



SAKSFRAMLEGG

Sakshandsamar: Jan Erik Boge	Arkivkode: FE-033
Arkivsaksnr: 19/804	Løpenr: 19/7402
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Kommunestyret	24.10.2019	068/2019

Møtelokale for kommunestyret, formannskapet, naturutvalet og kontrollutvalet

24.10.2019 Kommunestyret:

Handsaming i møtet:

Rådmannen sitt framlegg til vedtak vart samrøystes vedteke.

KS- 068/2019 Vedtak:

Møta i kommunestyret, formannskapet, naturutvalet og kontrollutvalet skal som hovudregel haldast i møterommet på biblioteket på Bjørkheim. Denne ordninga gjeld så lenge møtesalen på kommunehuset på Tysse ikkje har tilgjenge for rørslehemma

Rådmannen sitt framlegg til vedtak:

Møta i kommunestyret, formannskapet, naturutvalet og kontrollutvalet skal som hovudregel haldast i møterommet på biblioteket på Bjørkheim. Denne ordninga gjeld så lenge møtesalen på kommunehuset på Tysse ikkje har tilgjenge for rørslehemma.

Dokument som ikkje er vedlagt:

- Kommuneleva (<https://lovdata.no/dokument/NL/lov/2018-06-22-83>)
- Likestillings- og diskrimineringslova (<https://lovdata.no/lov/2017-06-16-51>)

Kva saka gjeld:

Etter at det nye biblioteket på Bjørkheim (Høgspen't'n) vart teke i bruk, har møta i kommunestyret vore vekselvis på kommunehuset og biblioteket. I tillegg har òg nokre formannskapsmøte vore på biblioteket.

Frå administrasjonen si side er det ønskeleg med ei ordning der møta i kommunestyret og formannskapet (samt eventuelt òg møta i naturutvalet og kontrollutvalet) vert haldne på ein fast plass. Dette kan vera enten på kommunehuset eller på biblioteket. I utgangspunktet vil det vera

naturleg å ha møta i møtesalen på kommunehuset, men manglande tilgjenge for rørslehemma gjer at dette truleg ikkje vil vera ei god løysing.

På biblioteket er det godt tilgjenge for rørslehemma (universell utforming).

Vurderingar og konsekvensar:

Det går fram av kommunelova § 11-5 (Møteoffentlighet) at alle har rett til å vera til stades i møte i folkevalde organ. Det kan vera litt uklart om denne regelen primært berre går på at møte i folkevalde organ skal vera offentlege/opne (ikkje lukka), eller om regelen i tillegg òg går på at møta må haldast i lokale som er tilrettelagt for alle (òg for rørslehemma). Det kan kanskje argumenterast for at kommunen gjennom å direkte streama møta i kommunestyret og formannskapet gir alle moglegheit til å vera «til stades» på desse møta. Det vil likevel truleg vera meir i tråd med intensjonen i lovverket at møte i folkevalde organ vert haldne i eit lokale der alle (òg rørslehemma) kan vera fysisk til stades. Jf. mellom anna reglar om krav til universell utforming i likestillings- og diskrimineringslova.

Møta i naturutvalet og kontrollutvalet vert ikkje streama på internett. Rørslehemma har derfor ikkje tilgjenge til møta i desse organa i dag.

Ordlyden om møteoffentlegheit er litt endra i den nye kommunelova (som trer i kraft ved det konstituerande kommunestyremøtet hausten 2019) i forhold til den «gamle» kommunelova. Det er uklart om den endra ordlyden inneber ei faktisk endring i reglane om retten til å vera til stades i møte i folkevalde organ.

Ordlyd i den nye kommunelova (LOV-2018-06-22-83):

§ 11-5. Møteoffentlighet

Alle har rett til å være til stede i møter i folkevalgte organer dersom ikke noe annet følger av denne paragrafen.

Ordlyd i den gamle kommunelova (LOV 1992-09-25-07):

§ 31. Møteoffentlighet

Enhver har rett til å overvære møtene i folkevalgte organer.

Det går med noko meir arbeidstid for administrasjonen til forarbeid og etterarbeid ved møte på biblioteket på Bjørkheim enn på kommunehuset. Det er òg meir praktisk for administrasjonen å ha møta på kommunehuset. Likevel bør truleg ikkje omsynet til administrasjonen vera avgjerande for kvar møta skal haldast. Det kan òg tenkjast ei ordning der dei folkevalde sjølv tek ansvar for noko av for- og etterarbeidet i samband med møte i folkevalde organ (for eksempel koking av kaffi, rydding etter møta m.m.), og at desse oppgåvene kan gå på omgang mellom partia/gruppene.

Rådmannen rår til at møta i kommunestyret, formannskapet, naturutvalet og kontrollutvalet som hovudregel vert haldne på biblioteket på Bjørkheim, og at denne ordninga skal gjelda så lenge det ikkje er tilgjenge for rørslehemma i møtesalen på kommunehuset.